



Sanaartugassanut aningaasaliissutissani 2017-mi 2018-milu Aasianni Kulturikkut illorsualiassamut katillugu 15 mio.kr.-nik nunatta karsia aningaasaleeqataasinnaanersoq misissoqqullugu Naalakkersuisut peqquneqarnissaanik inatsisartut aaliangiiffigisassaattut siunnersuut.
(Inatsisartunut Peter Olsen, Inuit Ataqatigiit)

Inuit Ataqatigiit isumaqarpugut inuiaat nukittuut pilersinneqartartut timikkut anersaakkut tarnikkullu ineriartutaasunik periarfissaqarluarunik. Taamaammat inuutissarsiornerinnaangitsumik inuiaat pikialarfeqartariaqarput tamakkiisumik ineriartussagunik. Oqaluffiit, timersortarfiit, aammalumi kulturikkut illorsuit tassaapput inunni anersaakkut ineriartortitsisut pikialarfiusullu pisariaqartitagut.

Siunnersuuteqartullu siunnersuutimini Aasiaat nipilersornikkut pikialarfiulluarnera uppersaatitalimmik oqaluttuaraa, festivalit assigiingitsut, inuit kajumissutsiminnik suliallit ineriartortitaraat, nunaqqatiminnut iluaqutaqisumik.

Naak Naalakkersuisut akissuteqaatiminni eqqaareeraluaraat kultureqarnermik innuttaasunillu qaammarsaanermut init allallu pisariaqartut inatsit atuuttoq naapertorlugu kommunit suliassarigaluaaraat, malugeqquara siunnersuuteqartup Naalakkersuisut misissuinissamik peqquneqaqqummagit.

Misissuineq tassaasariaqassaaq Qaasuitsup Kommunianik oqaloqateqarnek, paasiniaaneq, taamalu siunnersuinermik kingunilik. Tassami siunnersuuteqartup taareepaa Qaasuitsup Kommunianit titartaanermut aningaasanik immikkoortitserersimasooq. Tassa Aasianni kulturikkut illorsuaq pilersaarusiorniarneqalereersimavoq, taamaamallu Naalakkersuisut misissuisinnaapput, kommunimut oqaloqatiginninnikkut.

Aasianni Kulturikkut illorsuaqalernissaa Inuit Ataqatigiit qularutiginnigilaat Aasianniunnaangitsooq, kommuneqatinulli nunaqqataasunullu iluaqutaajumaartoq, soorlu Ilulissani, Sisimiuni Nuummilu illorsuit innuttaasunut iluaqutaanerattut.

Aasianni inuit kajumissutsiminnik suliaqartut, Kommunalbestyrelsillu takutereerpaat suleqataalluarsinnaallutik, aallarnisaasinnaallutik pilersitsisinnaallutillu, tamannalu Naalakkersuisut misissuinissaminnut aallarnisaatigilluarsinnaavaat.

Aasianni kultur illorsuanut inatsisartut suliassamik kaammattuinerat ingerlateqqikkumallugu siunnersuut ataatsimiitsitaliamut susassaartumut ingerlateqqikkumavarput.